

DOMINGU XIX TEMPU KOMÚN – TINAN A

Tema

Liturjia Domingu XIX Tempu Komún nia tema fundamentál mak Maromak nia revelasaun, Maromak ida prontu atu la'ó hamutuk ho ema sira, iha dalan istória nian.

Leitura dahuluk konvida fiar-na'in sira atu fila fali ba orijen sira-nia fiar nian no sira-nia kompromisu nian, atu halo peregrinasaun ida bá hasoru Maromak komuñau no Aliansa nian; no garante katak fiar-nain la hetan Maromak ne'e iha manifestasaun espetakulár sira, maibé iha simplisidade, iha interioridade.

Evanjellu apresenta mai ita reflesaun ida kona-ba dalan istóriu dixípulu sira nian, ne'ebé Na'i haruka ba "tasi nia sorin seluk" atu propoin ba ema sira festa han-hemu Reinu nian. Iha "viajen" ne'e, comunidade Reinu nian la mesak, ho forsa sira mate nian ne'ebé ameasa sira: Jezús, Maromak domin no komuñau nian bá hasoru dixípulu sira, lolo liman ba sira, haraik kbiit ba sira atu manán adversidade, deziluzau, ostilidade mundu nian. Dixípulu sira simu konvite atu rekoñese Nia, simu Nia no aseita Nia nu'udar "Na'i".

Leitura daruak sujere katak Maromak ne'ebé prontu atu hasoru ema sira no hatudu nia oin domin no laran-di'ak nian; Nia iha proposta ida salvasaun nian ne'ebé oferese ba ema hotu. Nia konvida ita atu matan moris ba manifestasaun sira Maromak ne'e nian no atu la lakon oportunidade salvasaun nian ne'ebé Nia oferese ba sira.

LEITURA I – 1 Reis 19,9a.11-13a

Ita-nia leitura lori ita ba Reinu Norte nian (Israel), durante Acab nia ukun (873-853 mK). Iha rai ne'e fatin atu adora lulik sira husi rai li'ur aumenta ba beibeik. Tuir 1 Re 16,31-33, liurai rasik – liuhusi Jezabel nia influénsia, nia feen ema husi Fenícia – nia harii altár sira ba Baal no Asserá no hasae kultu ba lulik sira ne'e, karik nu'udar abertura kulturál no komersiál.

Profeta Elias ba kontra hahalok ne'ebé la tuir fiar tradisionál. Nia mak representante israelita fiél sira, ne'ebé rekuza atu troka fali Jahwéh ho lulik/maromak rai li'ur nian iha Israel nia rain. Iha epizódiu dramátiku ida ne'ebé nia memória rai iha Livru Liurai/Reis sira nian, Elias rasik sadik profeta sira Baal nian ba taru-malu relijiozu ida, ne'ebé remata ho masakre ba Baal nia profeta 400, iha foho Carmelo (kf. 1 Re 18). Epizódiu ne'e mak representasaun teolójika luta ne'ebé mosu entre sira ne'ebé fiél ba Jahwéh no sira ne'ebé loke an ba influénsia kulturál no rleijioza povu seluk nian.

Testu ne'ebé ohin propoin mai ita nu'udar leitura dahuluk mai tuir kedas masakre iha Carmelo. Jezabel, simu tiha informasaun koena-ba profeta Baal sira nia mate, nia promete atu oho Elias; no profeta halai ba tasi-mane, atu salva ninia moris. Nia liu husi Reinu Sul nian (Judá), no hakat ba Beer-Sheva, atu dirije ba rai-fuik ne'ebé lori ba foho Horeb/Sinai (kf. 1 Re 19,1-8). Ne'e mak ita-nia testu nia kontestu.

MENSAJEN

Elias nia peregrinasaun ba Sinai/Horeb mak ain-hakat nia halo atu fila fali ba orijen. Ho Elias, Israel tomak –Israel infiél ba aliansa, ne'ebé monu ba kultu kananeu nia babeur sira – mak fila fali ba ninia orijen, ba fatin kompromisu inisál ho Maromak. Israel presiza hasoru filfali Jahwéh no deskobre hikas vokasaun Povu Aliansa nian.

Hanesan Maromak revela An ba Moisés iha Sinai/Horeb(kf. Ex 19,16-17; 33,18-23; 34,5-8), nune'e mós Nia revela An ba Elias iha fatin hanesan. Rezultadu revelasaun nian mak kompromisu ho Aliansa... Simu tiha revelasaun Jahwéh nian, Moisés sai instrumentu ne'ebé Maromak uza atu propoin Aliansa ida ba Povu; no Elias, simu tiha revelasaun husi Jahwéh, nia sai intrumentu atu Maromak halo hikas Aliansa ne'ebé kotu, tanba Povu nia infidelidade. Maibé iha diferença significativa entre revelasaun ba Moisés no Elias... Ba Moisés, Maromak hatudu An liuhusi fenómeno natural ne'ebé hamta'uk ("rai-tarutu no rai-lakan", "kalohan metan", "ahi-suar" ne'ebé haleu foho, "ahi", rai-nakdoko ne'ebé halo foho doko – Ex 19,16-17). Ba Elias, Maromak la revela An iha elementu típiku teofania nian (anin boot ne'ebé fera foho no fatuk-kuak sira", rai-nakdoko, ahi); maibé Nia revela An iha "anin maus". Iha Maromak nia manifestasaun nia oin, Elias kumpre rituál adekuadu: "taka nia oin ho liman", basá ema la bele kontempla oin ho oin Maromak nia mistériu.

Autór deutonomista sira nia intensaun la'ós atu halo polémika kontra katekeze tradisional Maromak nia manifestasaun nian... Parese katak sira hakarak tau distánsia entre Jahwéh no Baal, ne'ebé tuir mitolojia kananeia nu'udar maromak rai-tarutu no tempestade nian, ne'ebé halo rai nakdoko ho nia lian maka'as. Intensaun fundamentál autór nian mak hatudu katak Jahwéh la manifesta An iha fenómeno boboot no espetakulár sira, maibé iha intimidade, iha hakmatek, iha silénsiu ne'ebé nalian iha ema ne'ebé buka komuñuan ho Maromak nia fuan laran.

Enkontru ho Maromak ne'ebé manifesta iha silénsiu, iha intimidade, iha simplisidade, iha haraik-an, iha interioridade ema nia fuan nian lori ba asaun (Jahwéh konfia ba Elias misaun profétika ida – kf. 1 Re 19,15-18): enkontru ho Maromak lori nafatin ba empenhu konkretu ida no kompromisu ida ho mundu.

Ho Elias, Israel simu konvite atu fila fali ba inísiu, atu deskobe filafali Maromak nia Povu nia abut sira, atu hetan fali Jahwéh nia oin (ne'ebé diferente liu husi maromak seluk nia oin, ne'ebé loroloron babeur Povu no hadook sira husi sira-nia komrpomisu sira), atu hafoun Aliansa ho Nia, atu rona Maromak nia lian ne'ebé nalian iha membru comunidade ida-idak nia fuan, atu aseita Maromak nia testemuñu no Ninia projetu sira iha mundu nia leet.

LEITURA II – Rom 9,1-5

Aprezenta tiha iha kapitulu ualu Surat ba sarani sira iha Roma, katekeze ida kona-ba salvasaun, Paulo oras-ne'e refere kona-ba problema partikulár ida ne'ebé preokupa nia no sarani tomak: sá mak sei akontese ba Israel ne'ebé, maski sai Maromak nia Povu eleitu no Povu Promesa nian, rekuza salvasaun ne'ebé Kristu mai oferese? Israel sei la hetan salvasaun ho modu definitivu? Loloos, Maromak jura ba nia Povu, iha momentu oioin istória nian, atu liebrta nia, salva nia; se Maromak hasai Israel husi salvasaun, ita bele dehan katak Maromak falla? Ita sei bele konfia iha Ninia Liafuan? Ba kestaun sira-ne'e mak Paulo buka atu hatán iha kapitulu 9-11 Surat ba sarani sira iha Roma.

Testu ne'ebé ohin propoin mai ita nu'udar leitura daruak domingu ne'e nian mak introdusaun ba kestaun ida-ne'e.

MENSAJEN

Haree ba testu ne'e ita nota Paulo nia laran-susar no terus. Problema Israel nia salvasaun nian inkomoda maka'as Paulo to'o aseita atu simu "malisan"/"anátema" no implika, haketak an husi Kristu, se ida-ne'e serve atu Povu judeu aseita salvasaun ne'ebé Maromak oferese. Espresaun ne'e atu hatudu ideia sofrimentu boot ne'ebé Paulo iha no preokupasaun ba nia Povu nia sorte.

Loloos, Maromak foti Israel, halo nia sai Povu Aliansa nian, Lei nian, kultu nian, Promesa nian, bei-ala sira nian ne'ebé rona no moris iha komuñuun ho Nia... Israel mós mak Povu ne'ebé husi nia Kristu moris mai; entaun, Kristu ne'ebé “aas liu buat hotu” sei husik nia Povu “tuir isin” saran ba mate?

Paulo iha ninia reflesau tomak iha surat ne'e, hatudu katak Maromak nafatin fiél ba Ninia promesa sira no nunca falla... Nia iha ninia planu sira; no Israel nia dezobediénsia atuál, halo parte planu ne'e. Paulo nia konviksaun mak, Maromak nia laran-sadia sei suli ba Israel mós.

EVANJELLU – Mt 14,22-33

Testu Evanjellu ohin nian mai tuir epizódiu, iha ne'ebé Jezús, nu'udar Moisés foun lori povu ba rai-fuik atu liberta nia husi egoísmu no forma comunidade ida Reinu nian, comunidade ne'ebé rekoñese katak buat hotu mak Maromak nia don ida, destina atu fahe ho maluk sira. Mateus hahú hodi observa katak Jezús obriga eskolante sira sae roo atu bá tasi sori enkuantu nia despede ho ema lubun-boot (Mt 14,22). Jezús hakarak hamenus dixípulu sira nia entuziazmu esesivu (autór Evanjellu dahaat nian, kona-ba epizódiu ne'e, refere katak Jezús hadook An mesmesak iha foho, tanba hatene katak sira hakarak foti Nia ba liurai – Jo 6,15).

Epizódiu ne'e situa ita iha área bee-lihun Tiberíades eh Genesaré nian, ho kílometru 21 naruk nian no 12 luan nian situa iha Galileia no sai rezervatóriu boot liu bee nian iha Palestina.

Ba judeu sira, tasi – no bee-lihun Tiberíades nian ne'ebé judeu sira konsidera nu'udar “tasi” ida – mak fatin iha ne'ebé monstru sira, demóniu sira no kbiit hotu kontráriu ba moris no ema nia ksolok, horik bá. Tuir teolojia judaika, iha tasi laran, Maromak de'it mak bele salva ema husi diabu nia kbiit...

Ita hanoin mós katak ita-nia testu hola parte ba sesaun ida (kf. Mt 13,1-17,27) ita hanaran “instrusaun Reinu nian”. Iha ne'ebá, Mateus hatudu Jezús hanorin liuliu ba eskolante sira kona-ba valór no mistériu sira Reinu nian. Ne'e mak kontestu testu ohin nian.

Ita hanoin filafali katak Mateus hakerek iha dékada 80, ba comunidade ida ne'ebé lakon tiha ona entuziazmu insiál ba Jezús no ba Ninia Evanjellu no moris fiar ida iha komodizmu, ladún ezijente. Kontradisaun sira no persegisaun sira besik daudaun... Komunitade bele metin de'it se konfia iha Jezús, iha Ninia prezensa, iha Ninia protesau.

MENSAJEN

Despede tiha husi ema lubun boot no obriga eskolante sira atu ba tasi sorin, Jezús sae ba foho ida atu harohan, “mesmesak”. Mateus refere ba dala rua de'it kona-ba Jezús nia orasaun: iha-ne'e no iha epizódiu Getsemani (kf. Mt 26,36): iha kazu rua hotu, orasaun presede momentu ida prova nian ba dixípulu sira.

Enkuantu Jezús hela iha diálogu ho Aman, dixípulu sira mesak, iha viajen liu iha bee-lihun, viajen ida ne'ebé la hakmatek no difisil... Kalan boot; laloran sira baku ba roo no susar atu hean ba oin, hasoru anin kontráriu. Dixípulu sira la hakmatek no preokupadu, basá Jezús la hamutuk ho sira...

“Kalan” reprezenta nakukun, konfuzau, inseguransa ne'ebé dalabarak dixípulu sira “hean” iha laran, hodi la hatene ho modu ezatu atu liu husi dalan ne'ebé loos... “Laloran sira” ne'ebé baku roo reprezenta mundu nia ostilidade/ódiu, ne'ebé kontinua baku hasoru roo ne'ebé dixípulu sira hodi halo viajen... “anin kontráriu sira” reprezenta opozisaun, mundu nia rezisténsia ba Jezús nia projetu – projetu ne'ebé dixípulu sira fó sasin... Dala hira mak, iha sira-nia viajen iha istória, Jezús nia dixípulu sira sente lakon dalan, mesak, abandonadu, lakon korajen, deziludidu, la iha kbiit atu enfrenta tempestade sira ne'ebé forsa sira mate no opresaun nian (“tasi”) lansa hasoru sira...

Iha ne'ebá mak, Jezús manifesta ninia prezensa. Nia bá hasoru dixípulu sira “hodi la’o iha tasi leten” (vers. 26). Iha kontestu katekeze judaika, Maromak de’it mak “la’o iha tasi leten” (Job 9,8b; 38,16; Sal 77,20); Nia de’it halo “bee sira nakdoko no fatin kle’an sira nakdedar” (Sal 77,17); Nia de’it mak halo hakmatek laloran no tempestade sira (kf. Sal 107,25-30). Tanba ne’e, Jezús mak Maromak ne’ebé tau matan ba Ninia Povu no la husik nia monu ba kbiit sira mate nian (“tasi”) atu harahun nia. Espresaun “Ne’e mak Ha’u” reprodús fórmula identifikaun nian ho Maromak ne’ebé apresenta An ba ema sira iha Testamentu Tuan (kf. Ex 3,14; Is 43,3.10-11); no ezortasaun “iha konfiansa bá, keta ta’uk” tranzmite ba dixípulu sira serteza atu lalika ta’uk buat ida basá Jezús, Maromak ne’ebé manán kbiit sira mate no opresaun nian akompaña sira-nia ain-hakat ida-idak iha istória no haraik ba sira forsa atu manán adversidade, solidaun no mundu nia ostilidade/rai-kunan.

Hafoin, Mateus haktuir sena ida ne’ebé nia de’it mak iha: diálogu entre Pedro no Jezús (vers. 28-33). Buat hotu hahú ho Pedro nia pedidu: “Na’i, Ita Boot mak ne’e karik, haruka ha’u bá to’o Ita husi bee”. Pedro sai husi roo no bá duni hasoru Jezús; maibé, hakfodak ho anin nia violénsia, nia hahú mout no husu Jezús atu salva nia. Akontese nune’e duni, maski Jezús haksiak ninia fiar ki’ik no ninia laran rua-rua/dúvida sira.

Iha ne’e Pedro mak, portavós no representante komunidadade dixípulu sira-nian ne’ebé iha roo (Kreda) laran. Epizódium ne’e refleto dixípulu sira nia fiar ne’ebé frajil. Jezús komunika ba sira kbiit atu manán kbiit hotu mundu ne’e nian ne’ebé opoin ba ema nia moris, libertasaun, realizasaun, ksolok. Hasoru mundu nia hirus no anin mate nian, dixípulu sira debate entre konfiansa iha Jezús no ta’uk. Nune’e, Mateus refere dixípulu barak ninia esperiénsia ne’ebé tuir Jezús ho forma desidida, maibé sai nakdedar no nakdoko bainhira persegisaun, terus no difikuldade sira to’o mai... Entaun, sira hahú mout no tasi mate nian, frustrasaun nian, dezánimu nian, deziluzsaun nian... hahú tolan sira. No Jezús iha ne’ebá atu lolo liman ba sira no tulun sira.

Ikusmai, dixípulu sira nia deskonfiansa nakfilak tiha ba fiar metin/firme: “Ita-Boot mak Maromak nia Oan” (vers. 33). Relatu tomak konverje iha konfisaun fiar ne’e. Konfisaun ne’e refleto dixípulu loos sira nia fiar, ne’ebé haree iha Jezús Maromak ne’ebé manán “tasi”, Na’i moris no istória nian ne’ebé akompaña sira-nia dalan, haraik ba sira forsa atu manán opresaun no mate nia kbiit sira, lolo liman ba sira bainhira sira lakon korajen no ta’uk no la husik sira mout.

Bainhira mak dixípulu sira halo deskoberta katak Jezús mak Maromak manán-na’in salan no mate nian? Naturalmente, liutiha Páskua, bainhira sira komprende didi’ak Jezús nia mistériu (komprende katak nia la’ós “mate-klamar ida”), sira sente Ninia prezensa iha komunidadade ne’ebé halibur nia klaran, experimta Ninia tulun iha momentu difisil, katak Nia fó kbiit atu enfrenta mundu nia hirus no adversidade, sente Nia hamutuk ho sira, lolo liman ba sira, iha momentu frakeza nian, difikuldade nian, falta fiar nian. Ne’e mak esperiénsia ne’ebé Mateus konvida mós ita atu halo.